

Kalunga ta popile omuhupicua gue.

Omuprofeti Sakaria ta hokolola:

„Omujengeli oku ulukile ndje omusaseri omukuluntu, Josua, kua cikama koshipala shomujengeli gua Jehova; na satana okua cikama koluljo lue, e mu tamaneke. Jehova nokua lombuele satana, nokua ti: Jehova e ku lombuele, u muene satana, Jehova kui kua hogolola Jerusalem ne ku lombuele u muene! Nguka kee shi oshitemakuni sha nakulua momulilo? Ihe Josua okua zala oonguo da njata, oje sho a cikama koshipala shomujengeli. Oje nguka kua lombuele aamati, ja li pu je, nokua ti: Mu huleni oonguo de da njata; oje no kue mu lombuele nokua ti: Tala, omajonagulo goje nde ga dimi po, nonde ku zaleke oonguo duulenga. Oje nokua lombuele isheue nokua ti: Zalekeni omutse gue egala ejapuki. Ojo no ja zaleke omutse gue egala ejapuki no je mu zaleke oonguo. Omujengeli gua Jehova opo a li mpoka.” Sakaria 3: 1-5.

Muujuni uetestamenti eku lu omusaseri omukuluntu a tulua a kale omupokati; otashi ti: a kale omugalikaneni guoshiguana koshipala sha Kalunga. Oje auike a ziminua okuheda popepi na Kalunga omujapuki. Onkee nomusaseri je muene a li e nokukala omujapuki nomujogoki. Kehe lumue sho a ji muujapuki a li e nokuijoga naanaa nokuzala oonguo oontokele o po da jogua.

Ano memoniko lje Sakaria sho ta mono omusaseri Josua a cikama koshipala shomujengeli gua Kalunga e noonguo da njata, osho iihuna iinene. Satana a fa a guana shili okukala po nokutamaneka omuntu ngoka a pogola ngeji muua ua Kalunga.

Ihe ngele tatu diladila ngaaka, tu dimbulukueni: osho naanaa tu li koshipala sha Kalunga. Oje ngele te tu tala nomeho ge omajapuki, oonjata adike te di mono. Otse ngele tua tsika katu uete uulunde uetu, oje ina tsika. Ote tu konakona sigo muule uomadiladilo getu.

Oshinima sho shi li ngaaka, otse tatu kumicua isheue koohapu da Kalunga, sho ina hala omatamaneko ngoka ga satana, ihe te mu mueneke cilu. Kalunga ta popile nokuli Josua sho ta ti: „Nguka kee shi oshitemakuni sha nakulua momulilo?” Oshoka osho ngeji ta holola kutja Josua oje omuhupicua gue. Na ngoka Kalunga e mu hupica, ote mu diginine uo miikaha je; ite mu ecele momakaha ga satana.

Shika nashi tu tse omukumo shili. Nando uulunde uetu ouo uunene noonkondo, tau kondo shoka tse jene tu shi uviteko, natango tuu esilohenda lja Kalunga oljo enene li vule uulunde uetu. Kalunga ngoka a guana oku tu geela, oje tuu ngoka te tu popile no te tu hupica. Oje ta mutike okana komutamaneki guetu.

Omutokoli omujuuki ota vulu ngiini okupopila ngeji omuntu omulunde?

Oje ote shi ningi omolu Omuhupici guetu Jesus Kristus. Ngashi Josua a li a cikama koshipala sha Kalunga medina lJoshiguana ashihe sha Kalunga, osho unene omusaseri guetu omukuluntu Jesus Kristus a li a tamanekua ku satana omoluetu. Jesus nando a li po omujuuki nomujogoki kee noonjata da sha, ini ipopila, ihe a muena ashike nokua humbata oonjata detu adihe. Omolu eididimiko ndika lja Jesus omutamaneki guetu satana a tompua sigo a njengua okutja ue sha. Nokuli ina peua ue eha koshipala sha Kalunga, ihe a umbilua pevi. Omusaseri guetu omukuluntu Jesus okue tu longele ngeji ehupico lja guana. Omutokoli omujuuki a mono Omuhupicua omujuuki nkene e tu guanicile uo uujuuki auhe. Ngashingeji kaku na ue nando epangulo ljokukanica mboka je li mu Kristus Jesus.

Kalunga ita eca omuntu a kale noonjata duulunde. Omusaseri Josua a li e nokuhulua oonguo de da njata nokuzalekua oompe do opala do opalelela.

Osho natse uo tatu vulu okuhulua uulunde uetu e tatu zalekua uujuuki ua Kristus. Shika otashi ningua ngiini? Otashi tameke omuntu sho ita patana ue omajonagulo ge, ihe ta zimine e ga kucue mehe mpululo no medimopo ljoondjo. No sho e di kucua, ota taamba uo meitaalo edimopo ndjoka je ite li limbililua nando, ihe ti inekele shili kutja Omuhupicua ita tala ue oondjo de, aue, ota tala ashike uujuuki ua Kristus ua guana ua pua. Shika omuhongi Luther te shi icana elandakanico li nelago, Kristus sho ta peua oondjo detu no te di fala nkoka itadi galuka ko ue, otse no tatu peua uujuuki ue itau hulu po.

Ihe jaijee omuntu ngoka ta patana omajonagulo ge no ta tameke ashike okuipopila. Ota ti: Aue, inandi ninga sha. Nenge ta ti: Eeno, ongame omulunde, ihe osho tu li po tse aana jaantu atuhe. Nenge ta ti isheue: Ope na jamue mboka ja jono je vule ndje. Nomaipopilo ga tja ngaaka omuntu ti ikuca mo mepopilo ndjoka ejapuki lja Kristus Jesus. Oshoka ehupico lomuntu opo li kale kesilohenda alike, oli nokukala oshilonga sha Kalunga okuza petameko sigo kehulilo. Jesus Kristus oje e nokukala omutameki nomuguanici gueitaalo ljetu. Muujuuki ua Kristus ngele to guedele mo shoka shoje muene, oto njateke ajihe, nuujuuki mboka ue itau ku kuaca ue nando okashona.

Kala ano ngashi u li koshipala sha Kalunga, oje a uape oku ku ninga ngashi a hala. Oje te ku nakula momulilo guoheli no te ku zaleke oonguo da aadima e ta tula uo komutse guoje oshishani shomuenjo. Ote shi ningi omolu Jesus Kristus auike. Oje, omusaseri guetu omukuluntu na hambelelue aluheluhe!



Aaseminari jonaale.

OSEMINARI OMPE KOSHIGAMBO

Iilja oja tiligana, ihe aateji aashona. Galikaneni Omueene guetejo, oje a tume aalongi mepja lje.

Nando otu nooseminari mbaali nokuli, jimue kOniipa, nonkuauo kOngandjera, natango aalongi inaa guana. Onke ano Kalunga e tu zimine oseminari ontitatu ja tameke numvo kOshigambo. Ondjika ompe oja hala okuhumica komeho omboka ja piti nale ngele kOniipa ngele kOngandjera.

Tu kaleni nokugalikanena oseminari ndjika ompe ji kale ji na ejambeko moshilonga, ngashi dijaka donale da kala di li na. Ongundu jotango jonumvo ji na aalongikadona 13. Etameko eshona, ihe Kalunga ngele te li jambeke, otali vala tuu sha.

KATU NA MPAKA OSHILANDO TASHI
KALELELE. TU GALIKANENENI ANO OMA-
PONGO.



UUJELELE.

Tango tango Kalunga okua shiti uujelele komeho giishitua iikua uo nomuntu uo. Tse aaluude tu hoole omuntu omujelele kolutu lue. Oluindji tatu lalakanene okuijoga, opo tu ninge aajelele komalutu.

Esiku limue Omua guetu Jesus okua ti kaalongua je: „One uujelele u' uujuni. Oshilando sha tungilua kondundu itashi uapa okuholama.“ Mat. 5: 14. Ngashi naanaa hatu mono etango tali minikile uujuni auhe noonte daljo ihe ljoljene ihali zi ko ando li je pevi okuminikila. Osho tuu Omua nguka a peua epangelo alihe megulu nokombanda jevi ta holola uujelele ue maantu kombanda jevi. Esiku 9 Julie 1870 edina „Jesus“ lja popiua tango tango momakutsi gaauambo. Ondi shi shi okua kesiku ndjoka inapa pita ue esiku nando olimue mOuambo inamu tumbulua edina „Jesus“, sigo okesiku ndika.

Oomboka ja tsejica edina ndika Jesus mokati kaauambo ojo ja guanica oohapu dOmua a lombuele omuprofeti Jesaja sho a ti: „Olje ngo tandi mu tumu, nolje ngo te ke tu jile?“ Jes. 6:8. Ojo ja jamukula ngomuprofeti: „Ongame ngu, tuma ndje!“

Tse tua peua oohapu dOmua omagano. Otu li po tatu di njanjukilua sho tadi tu lombuele tua kulilua nombinzi jOmukulili guetu. Ope na jamue ja kukutike oomuenjo dauo nojo taa lombuelua ngeji: „Okuuva ohamu uuvu ko, ne kamu uvite ko, nokumona ohamu mono ko ne kamu luete ko.“ Mat. 13:14 b. Omupja omunene nguka to lombuelua ngaaka.

Ongoje uujelele u' uujuni ou nongunga okuhokolola Kristus Jesus Omukulili guujuni. Ongoje ou neui momuenjo guoje tali ti: „Olje ngo tandi mu tumu?“ Oto jamukula: „Andija manga?“ Nenge: „Ongame ngu, tuma ndje.“ Holola uujelele uoje, ino eca u dime.

Leevi O. Kadila.

OKUA TSEJA EJAMUKULO.

Omusamane omutakumi okua ningi iivike mombete ta aalukua. Oshoka oje omukriste, okua talaelua po komuhongi omunduisi. Omuhongi okue mu pula, ngele pe na uo jamue taje mu talele po.

- Eeno, ope na gumue ha talele ndje po kehe esiku.
- Omudiginini e cike mpoka olje?
- Oje satana.
- Ihe Petrus, satana oku na shike nangoje? Ote ende shike mpano?
- Ote ja aluhe noohapu dimue, odo dika: „Petrus, ongoje ua longele ndje oomvula odindji. Ngashingeji ongoje oquandje.“
- Oto mu jamukula ngiini?
- Ote ti: „Ngoje ua ningile ndje shike ndi kale guoje? Jesus Kristus, Omukulili guandje, okua sile ndje. Ihe ngoje, ongoje ua ningile ndje uuanaua ua shike?“
- Jaloo, Petrus, diginina ngaa ejamukulo ndjoka. Oshoka shaa tuu omutondi tu uuvu edina lja Kristus, oku nokuja ontuku.
- Eeno, omuhongi, osho nde shi dimbulula nokuli. Shaa tuu nda ti ngaaka, oje okua zi po pungame.

Omukuetu, ongoje u shi shi tuu, nkene u nokutida po omutondi, ngele a hala oku ku limbilika uo?

„Kalunga omunamapangelo agehe, ongoje nguka Epona ljoje ejapuki okua li kee na mpoka ta guilike omutse gue kombanda jevi, ongoje tatu ku hamlelele sho ue tu gamene koocina tadi kama ana joje oje ndji, no ue tu ziminine tu kale tu nombili mevi ljaandjeru tse tu li hoole.

Oomuenjo detu di egululila omaluhodi gomapongo no gaatidaganua, oomboka ja kanica oshindji shauo omolu eitaalo ljauro nomolu uuinaji u'oomuenjo daantu, no je li po ngashingeji aakuilongo nomapongo no kaje na nando sha ue shauo jene.

Tu kuaca tu shi dimbulule kokutja tse inatu hupicua sho tua li tua guana tu hupe, aue, okesilohenda ljoje alike tua hupu.

Huameka oomuenjo daantu jomoshiguana shaandjeru tu kuatue kuupenda uokukuaca omapongo naatidaganua.

Ongerki joje ji kuaca ojo ji kale egumbo ljomapongo, netegelelo ljaamboka ja kanica etegelelo alihe, ji kale eha nkoka iilalo jaantu otaji aluka omolu ohoole jEpona ljoje no jOmukulili guetu Jesus Kristus.“

Egalikano ndika olja tumua kaakuluntu jehangano ljoongerki domuujuni, no lja tuminau omagongalo agehe ge naakuaevangeli, nenge aaengisa nenge aakatoliki jopagreka nenge ooitaali jomongerki onkulu ngashi ji li mu Egypti no mu Abessinie.

Iita mbika iinene ja hugunine oja tidaganica aantu momagumbo gauo, no nena natango mu Europa omu nomapongo noontembukili mboka inajji imonena egumbo lja sha ongundu ji cike pomuaalu gaaantu ajehe jomu Suidwes-Afrika nojomu Union nando aaluude naatiligane ajehe ja jalulue kumue.

1948 aajuda sho ja lala evi lja Palestina, aajarabia ojendji ja adikila mo ojo ja cigi po omagumbo gauo, no ja ji ontuku. Omapongo gauo mboka inajji imonena natango egumbo lja sha ojo je li po natango je cike pomuaalu gaauambo noguaakavango ajehe kumue lue.

Omapongo omolu iita jomu Kina nojomu Korea ojendji unene, kaje shi kujalulua ue.

Oomiljona odindji dauo ojo aakriste aakuetu, noomiljona di vule doka, ojo otaa taalele egongalo noku-tegelele ekuaco ljaljo. Oongerki oda jelekela tuu oku ja kuaca kashona, ihe ekuaco oli nokutsikilua nokukolekua natango. Ekuaco ljomagongalo agehe inaga guana, omapangelo giilongo oge noku ja kuaca uo.

Ihe ekuaco lja guana nokuguanenena tali zile ku Kalunga ngoka ohu uvu omagalikano.

Tse mbaka tu li po tua kala tu nombili momagumbo vetu, otu nokukuaca mboka kaje nomagumbo, no tu noku ja galikanena shili, Kalunga ngoka iha nje-ngua ku sha, oje muene a kale te ja kuaca.

OSHINDJI SHA KANA.

Ooitaali ne jokomagongalo gokOuambo, otandi mu indile shili unene, mu tu indilile otse aagundjuka jomehalakano. Oshoka onda tala kutja tse aagundjuka mbaka tu li mUushimba otua kanica oshindji shomiipango ja Kalunga. Kape na ue ejoololo pokati komuuambo nomukuankala nenge omuuambo nomuherero nenge omukriste nomupagani. Ope na evundakano enene shili, onke te ti: Kondjeni shili momagalikano opo Omuene a njenganjenge moomuenjo daagundjuka tse tu dimbulule ehandu laje nounene uaje. Notu dimbulukue kevi lietu ljaauambo.

Naisheue oteti: Inamu dimbua uo omagongalo gUushimba oshoka omankundi meitaalo, ndele shika tashi mana po oonkondo dauo, osho iikolica. Esiku ljo sondaha oljo lja ningua ljokunua. Nena omuntu kee na ue ecimbo okuja kongerki. Na jamue taa ja oonkolue douala e taa koca ashike, ndele ope na uudigu oshoka Ombepo ja Kalunga ja fa jili kokule muka mevi ljuushimba. Ihe omukriste, ngoje omuuambo, ino puka u tje mUushimba kamu na aahogololua ja Kalunga. Aue omukuetu, omo ngaa jeli, uunkundi mbuka nomOuambo omo u li, ihe ngoje ngiika ino u dimbulula. Ano omukuetu, kotoka opo uaa kanice oshindji shoka ua peua kOmua.

Titus Shikongo
Windhoek



EKUNO NETEJO ENENE.

Onguka ha kunu mo ombuto onbuanaua, oje Omuna gu'Omuntu. Epja oljo uujuni. Ombuto ombuanaua, ojo aana joshilongo. Oman ogo aana jomuunaji. Nomutondadi ngoka e ga kunu mo, oje ondiaboli. Etejo oljo ehulilo ljuujuni, naateji ojo aajengeli. Ecimbo lja cikana ljokuteja. Omapja gevi oga toka.

Simon Otto.

INO IKUKUTIKA.

Te pandula kune amuhe mboka hamu njolele mOmukuetu. No tii mu halele eiambeko ljomumvo omupe. Omuaa na koleke ombepo jeni mu uape okulonga aantu je.

Natse aaleshi tuua ikukutike molu oohapu tue di uvu notadi tu ulumike tu longe shono sha halika. Aue, aluhe tu kaleni aapuli pamue nOmbepo jOmuaa ngashi kua njolua kaaheberi 3: 7-19.

Ano omuleshi, onena tu cikame tu landule Ombepo je, ngoka te tu pe oshilonga she. Inatu kala ouala tatu idingoloka niimpuju juujuni mbuka, tu tje: Kandi na onguuo nenge shike. Aue, amuhe mboka mu uvu eicano ljOmbepo jOmuaa, nomua hala okulonga oshilonga shOmuaa esiku ndika ljonena mu cikame mu tameke oshilonga shOmuaa.

Ejambeko tandi mu halele amuhe mboka mu uvite eicano ljoshilonga shOmuaa. Tameka pa Mbepo je!! Otii mu halele elunduluko ljOmumvo Omupe.

Simon Kotze Samuel.
Keetmanshoop.

JESUS A TAAMBUA.

Simon omufarisaji a taamba Jesus megumbo lje, ihe ha momuenjo gue.

Omukuluntu gaaakuiita guomu Kapernaum a taamba Jesus momuenjo gue, ihe ha megumbo lje.

Marta na Maria oja taamba Jesus moomuenjo dauo no megumbo ljauro.

Komukunda gumue guomu Samaria Jesus ina taambua nando.

Ongoje ongiini?

NDA LONGELE AAUA JAALI.

Guotango Kristus, okua pe ndje iikuti jokukondjica uuinaji. Omutijaali okua pe ndje olundja lumue luomuuhalu uonjama. Ongame no nde lu taamba te ti: Itau kuata ndje. Ihe uuhalu mbuka oua khatata ndje noua kanicica iikuti jandje nde ji pelue ku Kristus. Ongame omugojelela koshipala sha Kalunga! Ndaa shi kulongelua uuanaua ngini! Aamuameme, inamu ljatica nando ompadi jeni pehala tali longua uulunde. Nando u li po uushona, otau koko.

Simon Reinhold.
Grootfontein.

OMUAALUDUA TA NJANJUKILUA OMUAALUDI GUE.

Ondi na epandulo enene k'Omuaa omolu eaalu nde li taamba moshikaha she. Oandi shi tala sha k'Omuaa muene. Omomajemato guuehame omuaa ota kuaca, unene omuntu sho a kanica po einekelo lje. Okuinekela Omuaa taku eta ekuaco komuhepekua ngo a lololua kuujina ue. Omoshinima shika nda hala shili okugalikana aluhe ngashi omupsalmi ta galikana. Eps. 41:1-14.

Aamuameme ne aaholike, onda hala nokuhalelela ndi cindile uo mune omadiladilo ngaka gaali omanene: „Omomajemato guuehame Omuaa ota kuaca. Okuinekela Omuaa taku eta ekuaco.”

Kundueni mOmuaa.

T. Andima.

OONGUNGA.

Okua li ku na omutiligane gumue e na oongunga odindji, a ciminikua aluhe okufuta oongunga doka, nokua njengua oku di futa. Ode eta uujuhame momuenjo gue, okui idipaga jemuene i ijaha nondjembo.

Shino tashi tu longo okutula oongunga noondjo, unene doka dokomuenjo otadi fala omuntu meso ljokomuenjo. Ohatu mono ojendji sho taji idipaga jojene mokushuna monima kuaao omolu oondjo noongunga je di na.

Matheus Shatipamba.
Kaapstad.

ESINA LOKUKOSA.

Olo ola longua naua neendunge. Olo ola longua ngahelipi hano? Handi ja ndi ku lombuele. Okua longua ombia inene. Mokanja kajo omu nositenda hasi tanauka kombinga nombinga. Kositako sajo oku nomasina ane haa endifa ositenda. Mombia tamu i omeja noikutu tai i mujo. Omasina taa patululua nositenda tasi koso ne. Oso oikutu aise ja jela naua.

Oku na esina linene li dule omasina aese omounjuni. Olo Jesus Kristus. Oje ta koso eemuenjo detu koulunde. Hano kese tu ou e na omuenjo ua njata. u tuala kOmukulili.

Matheus Nekomba.
Windhoek.

27. 9. 1951.

BRANDBERG MINES, OMARURU.

Mu Brandberg, tete otua kala tu novakuateli komeso etu mu Jesus no meongalo laje ovo ava Absalom Aron na Absalom Martin. Mokushuna kuaavo mOuambo, ove tu fila oufije unene, osheshi ove tu fija tua fa eedi di he nomufita. Onke tua kendabala okuuilika vakuetu. Mikael Shikesho okua hovela oku tu udifila osondaha, na ame nda kondja okuuilika oluimbo. Ndele Omueene okue tu uda mokulila kuetu, okue tu tumina omulumeni a dja ku Tsumeb, e uja nomuhona uaje. Oje okua deuka naua momalongo. Okua hovela okuninga ohungi, mefiku kese oluimbo nokarta. Edina laje Werner Hiskia. Otue mu njakukilua, no hatu hambelele Omueene moluashi ina efa eongalo letu.

Ohai dimbulukua vali kutja tu ifileni oshisho mokuenda kuetu, kutja Omueene onaini te tu ile mounjuni ou. Ohai dimbulukua, nkene tua kala nomuhona uetu. Moku tu longifa okua kala ta ti: Handi mu lombuele: endeleleni, otamu njeke po oimaliva jange. Inapa pita nande eehani dihapu, a mana ouenda uaje, oimaliva e ji fija po.

Tu longua okuvalula omafiku etu, tu shive Omueene onaini to tu ile. Natu dimbulukue kutja, fje ovaenda kombada jedu eli. Eumbo letu oli li meulu.

Josef Wenonja.
Omukalongo ku Brandberg Mines,
Omaruru

Petameko ljomumvo nguka kua kala omapingacano ogendji gaahongi. Jamue ja ji ku Suomi, naape ojendji oje ja pomaha gauo.

Ku Suomi kua ji.

Omuhongi Hukka guok'Onguediva oje pamue nomukulukadi gue nojana.
Omuhongi Rantanen guok'Engela pamue nomukulukadi gue nojana.
Feilani A. K. Ripatti guok'Ongandjera;
Feilani Maire Tuhkanen guok'Ongandjera;
Feilani Rauha Voipio guok'Oniipa;
Feilani Linda Helenius guok'Eenana;
Feilani Lyyli Mantere guok'Onandjokue;
Feilani Liisa Uotila guoku Lupala k'Okavango.

Ku Suomi kua zi aahongi aape:

Omuhongi Toivo Tirronen nomukulukadi gue Ester nomuana Tauno. Ojo ja tula k'Oshigambo, ja ka tameke ko oseminari ompe.

Omuhongi Eero Hatakka nomukulukadi gue Anni, ojo ajhe jaali aalongi oja tula k'Oniipa ja ka longe moseminari, no je na uo okanona Helena.

Omuhongi Pauli Pennanen, omutekulu gua Eino Pennanen nguka a kala nale k'Olukonda noku Kuring-Kuru, nomukulukadi gue Aino. Ojo ja tula k'Engela, ihe otaa kuaca uo k'Onguediva, uunene mokupangela iihauto.

Ofeilani Anna Liisa Sorsa a tula k'Ongandjera a ka longe mu seminari.

Ofeilani Greta Airaksinen omupangi ta ka longa k'Onandjokue.

Omuhongi Eero Kanniainen, a tula k'Oniipa a ka longe moshinjangido. Oshinjangido osha mono ngeji ekuaco enene sho pue ja omuntu te shi kalele osho ashike. Omukulukadi gue Kaarina nomuana Heidi oje ja uo, ihe ja cigala manga ku Swakop. Otaa ja k'Ouambo nge kua piti oomuedi mbaali nenge ndatu.

Omukulukadi guomuhongi Ukko Karhunen ngoka e ja omumvogu noku tula k'Onguediva peha lja Hukka oje e ja uo. Edina lje oljo Terttu, no je nojaana Marja na Tapio.

Omuhongi Veikko Teinila, nomukulukadi gue Eila nokaana Yrjo ojo je ja pamue nomusamane Eriksson, ihe oja cigala manga k'Uushimba ja kale taji ilongo oshiafrikaans. Pamue ta ka talele po k'Ouambo uo numvo, ihe ojo taa ka tula k'Okavango.

Aakulu oja galuka:

Omuhongi Birger Eriksson, ngoka a kala nale k'Oniipa oje a galuka pamue nomukulukadi gue Anna nojaana Oile na Lasse na Helga na Ulla. Ojo oja tula k'Olukonda, nomusamane Eriksson ota peua uukuluntu uoshilonga ashike a je peha ljomusamane Alho ngoka ti ilongekida a shune ku Suomi.

Feilani Sylvi Kyllonen, a galuka uo no ta ka tsikila oshilonga she moseminari jok'Ongandjera.

Omapingacano:

Omuhongi Kekki a li k'Ombarantu oje a tembukile k'Engela koskola jaamati, nomuhongi Saarinen a li k'Onandjokue okua tembukile k'Ombarantu. Omukulukadi gue Eila sho ku li po ondohtora omupangi, aavu jokuuninginino uo oja mono ngeji ekuaco euanaua.

Ondohtora Anni Melander guok'Onandjokue ota tembukile ku Kuring-Kuru k'Okavango. K'Onandjokue tapu cigala ondohtora Inkeri Saloheimo e ja pehulilo ljomumvo gua ji.

Feilani Ebba von Pfaler guok'Ombarantu sho a mono ompito okucika ku Kaoko, feilani Bertta Rapo guok'Engela ota galukile k'Ombarantu nkoka a kala ko nale, na feilani Ilmi Laitinen ota ji k'Engela.

Feilani Liina Lindstrom guok'Olukonda a tembukile k'Oshigambo.

Oshikumica oshinene Kalunga sho te tu sile oshimpuju ngaaka noku tu tumina ongundu ji cike mpaka jaalongi aape. Ohenda ji tu kulukile ngaaka, ando tu uape oku ji taamba pahalo l'Omueene ji longemutse shoka oje e shi hala.

Tu galikaneneni aalongi ajehe jomepja l'Omuaa ja uape okuguanica oshilonga shauo.

Mateus Lukas, na Moses Ngifindaka, Keetmanshoop, otaa hokolola nkene aantu jane oje ende nokatamba kuundongi, ihe okatamba ka kando-ma, omagulu ga taalele pombanda. Kalunga a gamene tuu aantu inaa mona oshiponga.

Onesimus Akaua, a mono nkene Kalunga ha kuaca ohepele. Je muene a mono ekuaco enene moshiponga she, onke te tu kumagida tu dame k'Omuaa. P'Omuaa oku nenjanju enene. Ku Luderits kua shashua noku kolekua aamati 28 eti 27 lja Oktober noku kala enjanju enene shili okunjanjukilua esilohenda lja Kalunga.

N. P. Ambunda. Windhoek, te tu kundu nelaka ndika: Inatu koceni nga mbejaka jalue, ihe tu tonateni, tu idilikeneni.

M. S. Aankala, Tsumeb, oku nekundo tali ti: Kondja fijo ehulilo, ove oto ka mona osisani somuenjo.

Ismael Mualava, Tsumeb, a kumua osesi pomafiku aa opaipe ohatu lalakanene emona olo tali kulupa, ndele tua njengua okukonga emona lomeulu olo tali kala aluse.

Matti Shiljo te tu dimbuluca oku na ngoka ha mono meholamo. Nando oondjo domuntu inadi monika kaantu, oku na ngo e di mono.

J. S. Naikaku, Windhoek, a mona medu la Uushimba omu na emona lihapu, ndele ola kanifa ovauambo vahapu. Oje e tu halela jo enangeko nou-puna la Tate Kalunga omunamuenjo uashili fje tu mu shikule nomitima ijela.

H. A. Mualjanale, Usakos, okua mono iilonga iinene ja Kalunga, onke ota ti: Halleluja! - Nda hala okuhambelela Omuaa nomuenjo guandje aguhe. Oje oku na uo oshimpuju tuua kanice oluvalo luetu muulunde.

Johannes Nadedundja, ota njola: Ame ondi na oluhodi molu oulunde u'uugundjuka uange nou' uugundjuka uovakueta. Ovakueta tu dimbulukueni momailikano, opo tu ka peue osipeua somouhamba ua Tate Kalunga.

Usko I. Mika, Windhoek, ota njola: Onda hala tu kale tua tonata omokukala kuetu mondjila j'Omue-ne, saasi mounjuni ou omu na omahindo mahapu.

Natanael Kamanja a hokolola omuntu a hala okutala eso nkene lja tja noku si muudano ue. „Efjo ihali sovaelua oto liulula.”

Paulus Israel, Abenab, a hala nokuhalelela tuua kale ue aakriste jelaka, ihe tu kale aakriste ja shili.

H. Wiktor Nakuafila, ota ti: Oluindji ndi noshimpuju, ngele tatu ka mona tuu Tate megulu, nenge otatu uka peni ano? Ongoka ua koca, penduka, oshoka ua kulilua.

P. K. Kaoka, Windhoek, ota ti: Ngoka ui itaala shili, hambelele Omuaa, noje te ku guedele ko eitaalo.

Muatilefu Mudjanima, Kimberley, ota ti: Oihuna, eliko lounjuni esi tali tu imbi okuja ku Kalunga omunamuenjo.

Julius T. Kasinda, oku nekundo: Nando ondjila onde, natu kondjeni sigo tatu ka adeni kecikilo.

M. D. N., Ongandjera, ota ti: Tanga Omuaa. Oje te ku gamene.

Petrus Josef okua mono uunkolui nkene ue eta iihuna no te tu lombuele tu tileni iikolica.

Josua Haimbondi, Orangemund, a tila sho a mono nkene otu hoole uujuni.

Lukas Ampolo te tu londoda esiku lja hugunina li li popepi.

Lukas Abraham na David Shigueda, Windhoek, otaje tu ilikanene koshipala sh'Omueene kutja oje e tu pe eengono nouladi u'Omepo jaje a longemutse pamue nafje aluse.

Salomo Hambija, Orangemund, oku nenjanju enene oshoka aahongi ja mono ompito oku ja talele po omuedi kehe. Atuhe tua guana okuhambelele Kalunga omoluasho, oshoka ku Orange oku na-uambo ojendji no ja kala ongoonzi kadi nomusita.

F. Ninda, Usakos, te tu kumagida tu tonate shili. Okua mona nkene omumati omuambo edina laje Otto Johannes a hangika ta i k'Ouambo, ndelene mondjilakati efjo le mu hanga; keumbo ina fika ko vali.

J. W. oku noshimpuju tu kale tatu galikanene oomboka ja hala okushuna monima, ojo ja galukile koshigunda sh'Omuaa.